

# Službene novine Federacije BiH, broj 38/22

Na osnovu člana 17. stav 3. Zakona o lovstvu ("Službene novine Federacije BiH", br. 4/06, 8/10 i 81/14), na prijedlog kantonalnih ministarstava nadležnih za poslove lovstva, federalni ministar poljoprivrede, vodoprivrede i šumarstva donosi

## RJEŠENJE

### O USTANOVLJENJU UZGOJNIH PODRUČJA ZA MRKOG MEDVJEDA U FEDERACIJI BOSNE I HERCEGOVINE

I

Ovim Rješenjem ustanovljavaju se uzgojna područja za mrkog medvjeda koja obuhvataju staništa u kojima postoje ekološki i prirodni uslovi za opstanak, uspješan razvoj i reprodukciju mrkog medvjeda i u kojima se gospodari prema jedinstvenim kriterijima, i to:

1. Uzgojno područje za mrkog medvjeda u Unsko-sanskom kantonu,
2. Uzgojno područje za mrkog medvjeda u Tuzlanskom kantonu,
3. Uzgojno područje za mrkog medvjeda u Zeničko-dobojskom kantonu,
4. Uzgojno područje za mrkog medvjeda u Bosansko-podrinjskom kantonu Goražde,
5. Uzgojno područje za mrkog medvjeda u Srednjobosanskom kantonu,
6. Uzgojno područje za mrkog medvjeda u Hercegovačko-neretvanskom kantonu,
7. Uzgojno područje za mrkog medvjeda u Zapadnohercegovačkom kantonu,
8. Uzgojno područje za mrkog medvjeda u Kantonu Sarajevo,
9. Uzgojno područje za mrkog medvjeda u Kantonu 10.

Granice uzgojnog područja za mrkog medvjeda se podudaraju sa granicama kantona u kome je ustanovljeno uzgojno područje.

II

Mrkim medvjedom na uzgojnom području gospodari se na osnovu Plana gospodarenja mrkim medvjedom za uzgojno područje (u daljem tekstu: Plan gospodarenja) i Godišnjeg plana gospodarenja mrkim medvjedom za uzgojno područje (u daljem tekstu: Godišnji plan).

Plan gospodarenja i Godišnji plan predstavljaju cjelinu, s tim da je Plan gospodarenja stručni, a Godišnji plan provedbeni dokument.

### **III**

Plan gospodarenja izrađuju i donose korisnici lovišta obuhvaćeni u granicama uzgojnog područja, a odobrava ga nadležno kantonalno ministarstvo uz prethodnu saglasnost Federalnog ministarstva poljoprivrede, vodoprivrede i šumarstva i Federalnog ministarstva okoliša i turizma.

Plan gospodarenja je dugoročni planski akt kojim se uređuju osnovne odrednice obitavanja mrkog medvjeda i gospodarenja mrkim medvjedom na uzgojnom području i treba biti utemeljen na znanstvenim i ekološkim osnovama unutar zakonskih, upravnih, kulturnih, gospodarskih i socioloških okvira.

Revizija Plana gospodarenja vrši se kada se trajno ili bitno izmijene uslovi i okolnosti na kojima se isti zasniva, a posebno uslijed uginuća više od 1/3 populacije mrkog medvjeda, požara većih razmjera, elementarnih nepogoda, trovanja i slično.

Revizija Plana gospodarenja vrši se po istom postupku propisanom za njegovu izradu i donošenje.

Izrada i revizija Plana gospodarenja i izrada Godišnjeg plana može se povjeriti pravnom licu registrovanom za obavljanje djelatnosti iz oblasti lovstva, a koje u radnom odnosu ima najmanje jednog zaposlenika sa visokom stručnom spremom sa VII stepenom VSS, odnosno sa zvanjem master koji je stekao ovo zvanje po Bolonjskom procesu obrazovanja, a koje je u toku visokoškolskog obrazovanja pohađalo i položilo predmet "Lovstvo" i radnim iskustvom od najmanje tri godine na poslovima u oblasti lovstva ili fizičkom licu sa visokom stručnom spremom sa VII stepenom VSS, odnosno sa zvanjem master koji je stekao ovo zvanje po Bolonjskom procesu obrazovanja, a koje je u toku visokoškolskog obrazovanja pohađalo i položilo predmet "Lovstvo" i radnim iskustvom od najmanje tri godine na poslovima u oblasti lovstva, te da ima registrovan obrt za obavljanje djelatnosti iz oblasti lovstva.

Plan gospodarenja treba da sadrži sljedeće:

Namjenu plana, opće podatke o uzgojnog području, dosadašnje gospodarenje mrkim medvjedom na prostoru uzgojnog područja, status i sadašnje stanje mrkog medvjeda, inventarizaciju, gospodarenje mrkim medvjedom, istraživanje i monitoring, saradnja u gospodarenju populacijom mrkog medvjeda, osiguranje sredstava za provedbu plana, međunarodnu i nacionalnu zakonsku regulativu i ostale propise koji se odnose na mrkog medvjeda.

Realizaciji Plana gospodarenja može se pristupiti nakon što ga odobri nadležno kantonalno ministarstvo uz prethodnu saglasnost Federalnog ministarstva poljoprivrede, vodoprivrede i šumarstva i Federalnog ministarstva okoliša i turizma.

### **IV**

Godišnji plan izrađuju i donose korisnici lovišta obuhvaćeni u granicama područja, a odobrava ga nadležno kantonalno ministarstvo uz prethodnu saglasnost Federalnog ministarstva poljoprivrede, vodoprivrede i šumarstva i Federalnog ministarstva okoliša i turizma.

Godišnji plan donosi se u skladu sa Planom gospodarenja i treba da sadrži mjere koje će se provoditi u lovnoj godini za koju se isti donosi.

Godišnji plan treba da sadrži sljedeće:

Status i dosadašnje gospodarenje mrkim medvjedom, sadašnje stanje, rasprostranjenost i površine, kapacitet, brojnost i prirast, kriteriji za raspodjelu kvote, izlučivanje medvjeda u lovnoj godini, zakonske sankcije za krivolov, interventni odstrjel, dodatni odstrjel, stradanje od prometa i drugih razloga, očuvanje staništa, sukob s čovjekom, mjere za smanjivanje i naknadu šteta, mjere za smanjivanje opasnosti za ljude, sprječavanje pristupa medvjeda otpadu, problematični medvjedi, držanje medvjeda u zatočeništvu, uključivanje javnosti u donošenju plana, istraživanje i monitoring, objavljeni znanstveni radovi vezano za medvjeda na uzgojnem području i stupanje na snagu i važenje.

Realizaciji Godišnjeg plana može se pristupiti nakon što ga odobri nadležno kantonalno ministarstvo uz prethodnu saglasnost Federalnog ministarstva poljoprivrede, vodoprivrede i šumarstva i Federalnog ministarstva okoliša i turizma.

Korisnici lovišta odgovorni su za realizaciju Godišnjeg plana i najkasnije u roku od 15. dana od kraja lovne godine podnose izvještaj o njegovom izvršenju nadležnom kantonalnom ministarstvu, Federalnom ministarstvu okoliša i turizma i Federalnom ministarstvu poljoprivrede, vodoprivrede i šumarstva, sa prijedlogom narednog Godišnjeg plana.

## V

Danom stapanja na snagu ovog Rješenja prestaje da važi Rješenje o osnivanju uzgojnih područja za medvjeda ("Službene novine Federacije BiH", broj 63/08).

## VI

Ovo Rješenje stupa na snagu narednog dana od dana objavljivanja u "Službenim novinama Federacije BiH".

Broj 08-1-22/7-192-5/22  
16. maja/svibnja 2022. godine  
Sarajevo

Ministar  
Mr. sci. **Šemsudin Dedić**, s. r.